

Գոռ Ղազարյան
Երևանի պետական համալսարան
ghazaryan3329@gmail.com

ԼԵՌՆԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՅՄԱՆՆԵՐԸ

*«Որո՞նք են լինելու վաղու Հայաստանի սահմանները:
— Անոնք, որ պիտի գծեն հայ զինուորի արիությանն ու
հայրենասիրությանը»:*

Գարեգին Նժդեհ

Ներկայում է Ջորավար Գ. Նժդեհի
հավերժավառ հիշատակին:

Հիմնաբառեր. Լեռնահայաստանի Հանրապետություն, Սյունիք, Զանգեզուր, Արցախ, Վայոց ձոր, Նոր Բայազետ, Գողթան, Գարեգին Նժդեհ:

Ներածություն

Հայաստանի 1-ին Հանրապետության տարիներին (1918թ. մայիս – 1920թ. դեկտեմբեր) Զանգեզուրն ապրում էր որոշակի ինքնավար կյանքով՝ հաճախ ստիպված լինելով միայնակ դիմագրավել արտաքին մարտահրավերներին: 1920թ. դեկտեմբերին, Հայաստանի հարկադրված խորհրդայնացումից հետո Զանգեզուրը չընդունեց ստեղծված քաղաքական փոփոխությունները՝ դրանք համարելով Քենալական Թուրքիայի և Խորհրդային Ռուսաստանի կողմից Հայաստանի դեմ ուղղված համատեղ ռազմաքաղաքական գործողությունների հետևանք (Վրացեան 1967, 161–162): Թուրք-հայկական պատերազմում Հայաստանը ունեցել էր տարածքային մեծ կորուստներ: Անտրոշ էին մնում հայկական երեք երկրամասերի՝ Արցախի, Սյունիքի և Նախիջևանի ճակատագրերը (Նժդեհ 2002, 10–11): Ստեղծված ռազմաքաղաքական բարդ իրավիճակում 1920թ. դեկտեմբերի 25-ին Համազանգեզուրյան 1-ին համագումարը որոշեց երկրամասը հռչակել ինքնավար, մինչև քաղաքական հնարավորություն կստեղծվեր կրկին միանալու «իր մայր երկրի՝ Հայաստանի հետ» (Վրացեան 1967, 163): Ստեղծվեց Ինքնավար Սյունիքի Հանրապետությունը, որը 1921թ. ապրիլի 26-ին հրավիրված Համազանգեզուրյան 2-րդ համագումարում վերանվանվանվեց Լեռնահայաստանի Հանրապետություն (Նժդեհ 2021, 109–111):

Սյունիք-Լեռնահայաստանը (Ինքնավար Սյունիք և Լեռնահայաստան), թեպետ միջազգային ճանաչում չունեցավ, սակայն, դե ֆակտո լինելով ինքնիշխան հանրապետություն, իր գոյության կարճատև ժամանակահատվածում (1920թ.

* Ստացվել է 31.01.2025թ., ուղարկվել է գրախոսության՝ 07.02.2025թ., ընդունվել է տպագրության՝ 13.08.2025թ.:

ղեկտեմբեր – 1921թ. հուլիս) էական դերակատարում ունեցավ հայոց պատմության մեջ: Լեոնահայաստանի Հանրապետության սահմանները հետագայում հիմք հանդիսացան Խորհրդային Հայաստանի Զանգեզուրի գավառի, իսկ 1991թ. անկախացումից հետո՝ Հայաստանի Հանրապետության Սյունիքի մարզի ձևավորման գործում, ուստի ներկա աշխարհաքաղաքական զարգացումների համատեքստում կարևոր նշանակություն ունի այդ սահմանների հստակեցումը:

Թեպետ Զանգեզուրի գոյապայքարի մասին գրվել են մի շարք աշխատություններ, սակայն Լեոնահայաստանի սահմանների խնդրին առանձին անդրադարձ չի կատարվել: Հանրային ընկալումներում Լեոնահայաստանը հաճախ նույնացվում է Սյունիքի մարզի հետ, սակայն ուսումնասիրությունները ցույց են տալիս, որ այն ընդգրկել է նաև հարակից մի շարք տարածքներ՝ զգալիորեն տարբերվելով թե՛ ներկայիս Սյունիքի, թե՛ նախկին (խորհրդային և ցարական) Զանգեզուրի գավառի սահմաններից:

Սույն աշխատանքում առաջին անգամ փորձ է կատարվել պատմական սկզբնաղբյուրների և գիտական գրականության քննության հիման վրա հստակեցնել Լեոնահայաստանի Հանրապետության սահմանները, ներկայացնել այն տարածքները, որոնք երբևէ ներառվել են վերջինիս կազմում, ինչպես նաև ցույց տալ երկրի գոյության ընթացքում տարածքային փոփոխությունները և դրանց հիմնական պատճառները: Անդրադարձ է կատարվել հանրապետության վարչատարածքային բաժանումներին: Պատմաաշխարհագրական ուսումնասիրությունների հիման վրա խնդրո առարկա ժամանակաշրջանում հիշատակվող մի շարք բնակավայրեր նույնականացվել են ներկայիս բնակավայրերի հետ:

Հետազոտության համար հիմնական սկզբնաղբյուր են հանդիսացել Հայաստանի ազգային արխիվում պահվող փաստաթղթերը, որոնք առնչվում են 1920–1921 թթ. Հայաստանում ընթացած ռազմաքաղաքական իրադարձություններին (ՀԱԱ, ֆ. 37, ց. 1, գ. 9, թ. 30, 34; ֆ. 37, ց. 1, գ. 24, թ. 2–3; ֆ. 314, ց. 1, գ. 38, թ. 1–4): Լեոնահայաստանի սահմանների վերաբերյալ կարևոր տեղեկություններ է պարունակում Փետրվարյան ապստամբության շրջանում հրատարակված «Ազատ Հայաստան» թերթը (Ազատ Հայաստան 1921): Առանձնակի կարևորություն ունեն Զորավար Գ. Նժդեհի¹ և Ս. Վրացյանի² աշխատությունները (Նժդեհ 1999, 2002, 2006, 2021; Վրացեան 1967, 1993): Հ. Յ. Դաշնակցության պատմության թանգարանում (Երևան) պահպանվում են Փետրվարյան ապստամբության զորահրամանատար և Լեոնահայաստանի Հանրապետության փոխապարապետ Կոռո Ռարիսանյանի կողմից 1922թ. Թավրիզում կազմված երկու եզակի քարտեզներ: Դրանք ներկայացնում են ապստամբների կողմից գրավված տարածքները և Զանգեզուրի ճակատի զորքերի դասավորությունը՝ Լեոնահայաստանի անկման նախօրեին (քարտեզ 1; քարտեզ 2): Լեոնահայաստանի պատմության ուսումնասիրման համար մեծ արժեք է ներկայացնում Գ. Նժդեհի առաջարկով և վերջինիս տրամադ-

¹ Գ. Նժդեհը եղել է Լեոնահայաստանի Հանրապետության սպարապետը, առաջին վարչապետը և զինվորական ու արտաքին գործերի նախարարը (տե՛ս Գեորգեան 1991, 162):

² Ս. Վրացյանը 1921թ. հունիսի մեկից մինչև հանրապետության անկումը եղել է Լեոնահայաստանի Հանրապետության վարչապետ (տե՛ս Գեորգեան 1991, 164):

րած տեղեկությունների ու փաստաթղթերի հիման վրա Վ. Գեորգեանի կողմից գրված և 1923 թ. հրատարակված «Լեոնահայաստանի հերոսամարտը» աշխատությունը (Գեորգեան 1991, 19): Զանգեզուրի գոյապայքարի ամբողջական պատկերը համապարփակ ներկայացրել է պրոֆեսոր Ա. Սիմոնյանը «Զանգեզուրի գոյապայքարը 1917–1921 թթ.» մեծարժեք աշխատությունում (Սիմոնյան 2017):

Լեոնահայաստանի Հանրապետության սահմանների խնդիրը

Համազանգեզուրյան 1-ին համագումարի որոշման մեջ նշված է, որ Ինքնավար Սյունիքի սահմաններն են «Զանգեզուրի նախկին սահմանները» (Գեորգեան 1991, 126; Վրացեան 1993, 661; Նժդեհ 2006, 297):

1921 թ. ապրիլի 26–27-ի Համազանգեզուրյան 2-րդ համագումարը որոշում է «Ինքնավար լեոնաշխարհ Ազատ Սյունիքը» վերանվանել Լեոնահայաստան, որի մեջ մտնում են Զանգեզուրը, Վայոց ձորը (Դարավազյազ) և Լեոնային Ղարաբաղը (Սիմոնյան 2017, 875; Զիլֆուղարյան 2008, 8):

Լեոնահայաստանի սահմանների հարցին անդրադարձ է կատարվում նաև Լեոնահայաստանի և Խորհրդային Հայաստանի միջև ընթացող բանակցությունների ժամանակ: Մասնավորապես՝ 1921 թ. մայիսի 12-ին Սիսիանի շրջանի Կալաջուղ գյուղում տեղի է ունենում Խորհրդային Հայաստանի և Լեոնահայաստանի լիազոր պատվիրակությունների հանդիպումը (Խուդավերդյան 1988, 165; Սիմոնյան 1998, 72): Առաջին նիստը նախագահող Լեոնահայաստանի կառավարության պատվիրակության անդամ Գ. Տեր-Սինապյանը, անդրադառնալով Լեոնահայաստանի Հանրապետության սահմաններին, նշում է. «Ապրիլի 26-ին Սյունիքը կոչուեց Լեոնահայաստան, որի մեջ մտնում են նաև Վայոց Ձորը (Դարավազեազ) և Լեոնային Ղարաբաղը» (Վրացեան 1967, 236, 239):

1921 թ. հուլիսին, Սյունիքը թողնելուց առաջ, Գ. Նժդեհը, անդրադառնալով Լեոնահայաստանի սահմաններին, Հայաստանի Հեղկոմին գրում էր. «...Լեոնահայաստանը պարփակում է իր մեջ ամբողջ Զանգեզուրի գավառը, Լեոնային Ղարաբաղը, Վայոց ձորն ու Գողթանը: Լեոնահայաստանը իբրև մի վարչական միավոր և Հայաստանի անբաժան ինքնավար մասը, ...ենթարկվում է Հայաստանի կենտրոնական կառավարությանը» (Նժդեհ 1999, 166):

Ինչպես տեսնում ենք, Լեոնահայաստանի Հանրապետության սահմանների վերաբերյալ տարբեր տեղերում զգալիորեն իրարից տարբերվող տվյալներ են նշվում: Ըստ Գ. Նժդեհի՝ Լեոնահայաստանի Հանրապետությունը ներառում էր վերոնշյալ չորս երկրամասերը, սակայն պատմագիտական ուսումնասիրությունները ցույց են տալիս, որ ռազմաքաղաքական իրադրությունների փոփոխությունների հետևանքով այդ տարածքները հաճախ անցնում էին ձեռքից ձեռք: Լեոնահայաստանի Հանրապետության սահմանները և դրանց փոփոխությունները պարզելու համար հարկավոր է մանրամասն վերլուծել նշված երկրամասերի պատկանելիության հարցը Սյունիք-Լեոնահայաստանի Հանրապետության գոյության շրջանում (1920 թ. դեկտեմբեր – 1921 թ. հուլիս)՝ ցույց տալով նաև դրանց ընդգրկված տարածքները:

Ձանգեգուր

Համազանգեգուրյան 1-ին համագումարի որոշմամբ Ինքնավար Սյունիքի սահմաններ ճանաչվեցին «Ձանգեգուրի նախկին սահմանները» (Գեորգեան 1991, 126; Վրացեան 1993, 661; Նժդեհ 2006, 297; Ալեքսանյան 2019, 20): Ձանգեգուրն աշխարհագրորեն զբաղեցնում էր Ձանգեգուրի և Ղարաբաղի լեռնաշղթաների և Արաքս գետի միջև ընկած տարածքը (Լիսիցյան 1969, 13): Ռուսական կայսրության Ելիզավետպոլի նահանգի Ձանգեգուրի գավառը 1917 թ. դրությամբ ուներ շուրջ 7800 քառակուսի կիլոմետր տարածք (Գեորգեան 1991, 19; Սիմոնյան 2017, 44): Կենտրոնը Գորիս քաղաքն էր: Գորիսից բացի (Գորիսի ոստ. տեղ. (ք. Գորիս)) բաժանված էր 5 ոստիկանական տեղամասի՝ I ոստ. տեղ. (գ. Ղարաքիլիսա), 2-րդ ոստ. տեղ. (գ. Տեղ), 3-րդ ոստ. տեղ. (գ. Դոնդարլու), 4-րդ ոստ. տեղ. (գ. Քիշիկլու), 5-րդ ոստ. տեղ. (Վատարի գործարան) (Кавказский календарь 1916, 139; Հայաստանի ազգային ատլաս 2008, 82):

Ձանգեգուրի գավառը ընդգրկում էր այժմյան Հայաստանի Հանրապետության Սյունիքի մարզը, ինչպես նաև Լեռնային Ղարաբաղի Հանրապետության որոշ տարածքներ, մասնավորապես՝ Քաշաթաղի շրջանը, Շուշիի շրջանի Բերդաձորի ենթաշրջանը և Մեծ Քիրս լեռան հարավարևմտյան ստորոտին գտնվող «Ղուգեյի գյուղերը»՝ Հաղբութի շրջանում (Խաչատրյան և ուրշ. 2015, 11–12):

Համազանգեգուրյան 1-ին համագումարի որոշումով Ինքնավար Սյունիքը բաժանվեց 6 շրջանների՝ բուն Ձանգեգուր (Գորիս), Տաթևի ձոր, Ղափան (Կապան), Դարաբասի ձոր, Միսիան, Գենվազ (Արևիք, Մեղրի) (Վրացեան 1993, 662–663; Սիմոնյան 2017, 783–784): Վ. Գեորգեանը ներկայացնում է նշված վեց շրջաններում ներառված հիմնական գյուղերի ցանկը (Գեորգեան 1991, 19–20), ինչի շնորհիվ կարողանում ենք պատկերացում կազմել Ձանգեգուրի ներքին վարչատարածքային բաժանման մասին: Բուն Ձանգեգուրի շրջանի կազմում ներառված էին՝ Քարահունջ, Խնձորեսկ, Կոռնձոր, Տեղ, Արավիս (Արավուս³), Խնածախ, Բայանդուր (Վաղատուր), Խոզնավար, Քարաշեն, Բոուն (Ակներ), Հին Գորիս (Վերիշեն), Գորիս գյուղ, Մալանջուկ (Մաղանջուղ), Գերու (Ձորաշեն), Աղղուղի-Շեն (Ազատաշեն) և Հալաք (հետագայում միացել է Վաղատուրին, տե՛ս Հակոբյան և ուրշ. 1991, 305) հայկական գյուղերը: Տաթևի շրջանի մեջ էին ներառված՝ Խոտ, Շինուհայր, Հալիձոր, Տանձատափ, Երիցաթումբ (Բարձրավան), Սվարանց, Տաթև և Յայջի (Հարժիս) գյուղերը: Ղափանի շրջանի կազմում ներառված էին հետևյալ գյուղերը՝ Վերին Խոտանան, Ներքին Խոտանան, Շրդևանց (Շրվենանց), Նորաշենիկ, Առաջաձոր, Խլաթաղ (Ձորաստան), Կավարտ, Բելս, Բաղարուրջ, Վաչագան (Վերին Վաչագան), Բարաբաթում (ներկայումս ներառված է Կապան քաղաքի կազմում), Արծվենիկ (Արծվանիկ), Չափնի, Ըրկենանց, Սևաքար, Ջեյվա (Դավիթ-Բեկ), Մողես, Վժենիս (Ուժանիս), Եղավարդ (Եղվարդ), Ագարակ, Խղրանց, Գյուտկում (Գեղանուշ), Ճակատեն, Շիկահող, Ներքին Հանդ, Սրաշեն, Ծավ, Կեմանց և Շիշկերտ: Դարաբասի շրջանում ընդգրկված էին՝ Լծեն, Դարապաս (Դարբաս), Լոր, Գետաթաղ, Շնաթաղ (Շենաթաղ) գյուղերը: Միսիանի շրջանում նե-

³ Փակագծերում տրված են բնակավայրերի մեր կողմից նույնականացված այժմյան անվանումները:

րառված էին՝ Ուզ (Ույծ), Ղարաքիլիսա (Միսիան), Ախլաթյան, Տուլորս (Տուլորս), Բունիս, Աղքեանդ (Աշոտավան), Ալիլու (Սավարդ), Բոնակոթ, Թագագեղ (Թասիկ), Բալաք, Մագրա (Մուցք), Շաղատ, Անգեղակոթ, Մուխուրթույան (Մուխուրթորյան), Ղալաջուղ (Սպանդարյան), Բարիսովկա (Ծղուկ) և Բագարչայ (Գորայք) գյուղերը: Գենվազի շրջանի (Արևիք) կենտրոնը Մեղրի ավանն էր, որից քիչ հեռու գտնվում էր Կարճևան գյուղը (Գեորգեան 1991, 19–20): Վ. Գեորգեանը չի ներկայացնում Գենվազի շրջանի կազմում ներառված մյուս բնակավայրերի ցանկը, սակայն ըստ էության դրանք հիմնականում համապատասխանում են նախկին Ելիզավետպոլի նահանգի Զանգեզուրի գավառի Մեղրիի ոստիկանական շրջանի կազմում ներառված գյուղերին, որոնք հետագայում ներառվեցին Խորհրդային Հայաստանի Մեղրիի գավառի կազմում՝ Լիճք, Շվանիձոր, Տաշտուն, Վանք, Կալեր և այլն (Մուքիսայան 2021, 168):

Արձանագրություններում նշվում է, որ Համագանգեզուրյան 1-ին համագումարին ներկա էին Զանգեզուրի բոլոր շրջանների 69, իսկ 2-րդ համագումարին՝ 64 գյուղերից ընտրված և ուղարկված պատգամավորներ (Նժդեհ 2002, 212; Նժդեհ 2021, 109): Սակայն Զանգեզուրի գյուղերի թիվն անշուշտ ավելի մեծ էր: Կարելի է ենթադրել, որ ստեղծված ռազմաքաղաքական և սոցիալ-տնտեսական բարդ ժամանակաշրջանում, որոշ գյուղեր չեն կարողացել մասնակցել երկրամասի համար մեծ նշանակություն ունեցող նշված երկու համագումարներին:

Այսպիսով, թեպետ հռչակագրում նշվում էր, թե Ինքնավար Սյունիքի սահմաններն են Զանգեզուրի նախկին սահմանները, սակայն սկզբնական շրջանում Ցարական Ռուսաստանի Զանգեզուրի գավառի արևելյան մասը ներառված չէր Ինքնավար Սյունիքի վարչատարածքային բաժանման համակարգում: Այդ շրջանները Գ. Նժդեհի գլխավորած զորքերը կարողացել էին ազատագրել 1920թ. գարնանը (Ղազարյան 2022, 47–48), սակայն Ինքնավար Սյունիքի հռչակման ժամանակ (1920թ. դեկտեմբեր) հանրապետության վերահսկողությունը նշված շրջանների վրա չէր տարածվում: Դրա հյուսիսային մասը Ինքնավար Սյունիքի կազմում ներառվեց ավելի ուշ: Մասնավորապես 1921թ. հունիսին հակառակորդն ուժեր է կենտրոնացնում արևելյան ճակատում՝ Զաբուղի ուղղությամբ Գորիսի դեմ մարտական գործողություններ սկսելու մտադրությամբ (Նժդեհ 1999, 144): Հունիսի 18-ին կարմիրների ուժերը ցրելու նպատակով՝ Գ. Նժդեհը մի փոքր զորամասով անցնում է խորհրդայնացած թուրքական շրջանով: Բարգուշատի⁴ թուրքերը, որոնք մեկ տարի գտնվում էին բոլշևիկների իշխանության տակ, Գ. Նժդեհին դիմավորում են «աղ ու հացով և հպատակություն հայտնում», իսկ շրջանի միլիցիական մասերը «խուճապով փախչում են դեպի Խանլըղ (Խանուխ⁵ – Գ.Ղ.)» (Նժդեհ 1999, 145): Գ. Նժդեհը հպատակություն հայտնած այդ գյուղերի համար նշանակում է կոմիսար և անցնում Գորիս (Նժդեհ 1999, 145):

⁴ Բարգուշատ (Մյուս Բաղք, Քաշունիք) է կոչվել Մեծ Հայքի Սյունիք աշխարհի Բաղք գավառի արևելյան մասը (Լիսիցյան 1969, 14; Հակոբյան և ուրշ. 1986, 580):

⁵ Խանլըղ (Խանուխ) – գյուղ Կովսականի շրջանում, Հազարի գետի ստորին հոսանքի ձախ ափին, Հազարի և Որոտան գետերի գետախառնուրդից մոտ 9 կմ հյուսիս (Հակոբյան և ուրշ. 1988, 649):

Փաստորեն, նախկին Ռուսական կայսրության Ելիզավետպոլի նահանգի Զանգեզուրի գավառի մեծագույն մասը ներառվեց Սյունիք-Լեռնահայաստանի կազմում՝ բացառությամբ 2-րդ ոստիկանական տեղամասի (գ. Տեղ) հյուսիս-արևելյան և 3-րդ ոստիկանական տեղամասի (գ. Դոնդարլու) հարավ-արևելյան հատվածների:

Զանգեզուրի խորհրդայնացումից հետո, Խորհրդային Հայաստանի Զանգեզուրի գավառի կազմում ներառվեց նախկին Ռուսական կայսրության Ելիզավետպոլի նահանգի Զանգեզուրի գավառի արևմտյան մասը միայն⁶, որը Գ. Նժդեհի շնորհիվ մնացել էր հայկական և մաքրվել թուրք-թաթարական հորդաններից (Սուքիասյան 2021, 165):

Լեռնային Ղարաբաղ

Հանրապետության հռչակումից հետո, ռազմաքաղաքական իրադրությունների հետագա փոփոխությունների արդյունքում Ինքնավար Սյունիքը կարողացավ ընդլայնել իր սահմանները՝ դուրս գալով Զանգեզուրի սահմաններից:

Ինքնավար Սյունիքի փաստացի անկախության հանգամանքը ազդեցություն գործեց նաև Լեռնային Ղարաբաղի հայ բնակչության վրա: Խորհրդային Ադրբեջանի գործերի ներկայությունը Լեռնային Ղարաբաղում առաջ էր բերել մեծ դժգոհություն, ուստի արցախահայությունը փնտրում էր բարենպաստ հնարավորություն ազատագրվելու համար: Արցախի ազատագրական պայքարը գլխավորում էր նշանավոր պետական-ռազմական գործիչ Թևոս Ստեփանյանը, ով գործում էր Գ. Նժդեհի ցուցումներով (Աբրահամյան 2003, 248–249): 1921թ. հունվարի 7-ին Գ. Նժդեհը Ղարաբաղից ստանում է հետևյալ տողերը. «Խնդրում ենք ձեզից խնայել Ղարաբաղի հայ ժողովուրդին, որն սպասում է ձեզ գիշեր-ցերեկ... Յունվ. 3, 1921թ.» (Նժդեհ 1999, 96): Գ. Նժդեհը չէր կարող անտեսել արցախահայության խնդրանքը, քանզի խորապես մտահոգված էր տարածաշրջանում ընթացող իրադարձություններով⁷: Հունվարի կեսերին, Գ. Նժդեհի հրամանով Ղարաբաղ անցած այրենցիների զորամասի (հրամանատար՝ Տեր-Պետրոսյան) աջակցությամբ տեղի ապստամբները մի քանի օրվա ընթացքում Դիզակը ամբողջությամբ ազատագրում են բուլշևիկներից (Գեորգեան 1991, 128; Աբրահամյան 1998, 52; Նժդեհ 2002, 143): Խորհրդային գործերը, կրելով պարտություն, նահանջում են նաև Վարանդայի շրջանում և, քաշվելով դեպի հարավ, ամրանում Հաղրոթում (Ղազարյան 2022, 53): Շուտով հայերի ձեռքն է անցնում նաև Հաղրոթն իր շրջակա գյուղերով (Նժդեհ 1999, 96; Գեորգեան 1991, 128): «Մարտի 8-ին Խորհրդային գործերը կորցնում են Ղարաբաղում ունեցած իրենց վերջին յենակետը: Մերոնց ճակատային մի խիզախ գրոհից հանկարծակիի եկած՝ թշնամին խուճապով փախչում է դեպի Զիբրայիլ, թողնելով հարյուրավոր սպանված, 150 գերի, ռազմամթերք, գնդա-

⁶ Խորհրդային Հայաստանի Զանգեզուրի գավառի ձևավորման մասին մանրամասն տե՛ս Սուքիասյան Հ., Խորհրդային Հայաստանի Զանգեզուրի գավառի կազմակերպման պատմությունից (1921թ.) (Սուքիասյան 2021):

⁷ Գ. Նժդեհի և Արցախի գոյապայքարի մասին մանրամասն տե՛ս Ղազարյան Գ., Գարեգին Նժդեհը և Արցախի գոյապայքարը 1920–1921 թթ. (Ղազարյան 2022):

ցիրներ, հացի պաշար և այլն: Այսպիսով, Լեոնային Ղարաբաղը թոթափում է սովետական լուծը և միանում Սյունիքին», — գրում է Գ. Նժդեհը (Նժդեհ 1999, 96): Դիզակը, Վարանդան և Խաչենի զգալի մասը անցնում են հայկական կողմի վերահսկողության տակ (Աբրահամյան 1998, 11, 52–53; Բալայան 2011, 232): Այս իրադարձությունների մասին հայոց բանակի բրիտանացի սպա Օլիվեր Բոլդուինը գրում է, որ թեպետ Կարմիր բանակը բռնազավթել էր գրեթե ամբողջ Հայաստանը, սակայն Գ. Նժդեհի առաջնորդությամբ «հարավում գտնվող լեոնային շրջաններ՝ Ղարաբաղն ու Զանգեզուրը անառիկ էին մնացել» (Բոլդուին 2022, 103–105): 1921թ. մարտի 5-ին Քեշիշքենդից (Եղեգնաձոր) Եղիշե Իշխանյանը Գ. Նժդեհին գրում էր. «Դուք գերմարդկային ճիգեր թափելով ազատագրեցիք ամբողջ Զանգեզուր-Ղարաբաղը...» (Գէորգեան 1991, 149): Թեպետ փաստաթղթերում ընդհանրական նշվում է, որ Լեոնահայաստանի մեջ մտնում է նաև Լեոնային Ղարաբաղը (Վրացեան 1967, 236, 239; Զիլֆուղարյան 2008, 8), սակայն վերջինիս հյուսիսային շրջանների մասին տեղեկություններ մեզ չհաջողվեց գտնել, իսկ հայտարարություններում և աղբյուրներում, որպես Լեոնահայաստանի մաս, նշվում են Դիզակի, Վարանդայի, հազվադեպ նաև Խաչենի շրջանները: Այսպես, 1921թ. մարտի 7-ին Հայրենիքի փրկության կոմիտեի տեղեկատու բյուրոն արտակարգ հաղորդագրությունում նշում էր. «Ստեղծել է Լեոնահայաստան, որի մեջ մտնում են՝ Դարալագեազը, բուն Զանգեզուրը, Սիսեանը, Ղափանը, Գողթանը, Մեղրին և Ղարաբաղը: Մեր ձեռքն է Դիզակը և Վարանդան...» (ՀԱԱ, ֆ. 37, ց. 1, գ. 9, թ. 30): Երկու օր անց՝ 1921թ. մարտի 9-ին «Ազատ Հայաստան» թերթը գրում էր. «Մեր ներկայացուցիչները Զանգեզուրից հաղորդում են, որ կազմվել է ինքնավար Լեոնահայաստան, որի մեջ մտնում են՝ Դարալագեազը, բուն Զանգեզուրը, Սիսիանը, Կապանը, Գողթանը, Մեղրին և Լեոնային Ղարաբաղը (Դիզակ, Վարանդա և Խաչեն): Այդ բոլոր շրջանները արդեն ենթարկվում են հատուկ կառավարության, որն ընտրված է Տաթևի վանքում տեղի ունեցած համագումարում» (Ազատ Հայաստան 1921):

Լեոնային Ղարաբաղի ազատագրված տարածքների աշխարհագրության մասին ստույգ տեղեկություններ է հաղորդում ապստամբության ղեկավար Թևան Ստեփանյանը 1941թ. նոյեմբերին խորհրդային չեկիստների կողմից ձերբակալվելուց հետո՝ հարցաքննության ժամանակ: «...Անընդմեջ կռիվներով գրավեցի Լեոնային Ղարաբաղի Դիզակի և Վարանդայի բոլոր գյուղերը, ...իմ ջոկատներով ես հասա Ասկերան, այսինքն՝ Լեոնային Ղարաբաղի և Աղբրեջանի Աղդամի շրջանի սահմանին», — նշում է Թևան Ստեփանյանը (Աբրահամյան 1998, 52–53):

Լեոնային Ղարաբաղը Սյունիք-Լեոնահայաստանի կազմում մնում է մինչև 1921թ. ապրիլի կեսերը: Խորհրդային Աղբրեջանը երկրամաս է ուղարկում մեծաքանակ ուժեր: Միաժամանակ արցախահայությունը գտնվում էր հոգեբանական ծանր իրավիճակում: Գ. Նժդեհի հաղորդմամբ Վրաստանի խորհրդայնացումը, ապա խորհրդայի ուժերի կողմից Երևանի վերագրավումը հուսահատեցնում է արցախահայությանը: Ղարաբաղի զանգեզուրյան զորամասի հրամանատար Տեր-Պետրոսյանը 1921թ. ապրիլի 8-ին Գ. Նժդեհին գրում էր. «Ես նույնիսկ կասկածում եմ, որ մենք կարողանանք այստեղից ապահով դուրս գալ», իսկ ապրիլի 12-ի գրությամբ տեղեկացնում. «Կամուրջը քանդված է, հաղորդակցությունը կտրված,

կոիվերը սկսված» (Նժդեհ 1999, 96–97): Ղարաբաղից տեղեկացնելով հայկական վաշտերի ծանր դրության մասին՝ Գ. Նժդեհից խնդրում են շուտափույթ օգնություն: Ապրիլի 18-ի գիշերը Սյունիքի ուժերը հրամանատար Գարեգին Ամիրջանյանի ղեկավարությամբ անցնում են Զաքուղը, ճեղքում Կարմիր բանակի պաշարման գիծը՝ հնարավորություն ստեղծելով հայկական վաշտերի համար անկորուստ անցնել Սյունիք (Նժդեհ 1999, 100; Գեորգեան 1991, 154–155): Ապրիլի 19-ին հայկական ուժերը (մոտ 700 հոգի) Լեռնային Ղարաբաղում թողնում են վերջին ռազմավարական կետը՝ Խծաբերդ գյուղը, և անցնելով Սյունիք՝ միանում Գ. Նժդեհի ուժերին (Աբրահամյան 1998, 15–16):

Վայոց ձոր և Նոր Բայազետ

1921թ. փետրվարին Գ. Նժդեհը ձեռնամուխ է լինում Վայոց ձորի ազատագրմանը, որի նպատակն էր.

1. Երևանի համար դեպի Սյունիք բացել մի դուռ,
2. Վերցրած գերիներով ապահովել խորհրդային բանտերում եղած հայ մտավորականների կյանքը,
3. Հոգեբանորեն հրահրել և հնարավոր դարձնել մի հակաբոլշևիկյան պոռթկում Արարատյան Հայաստանում» (Նժդեհ 2002, 133):

1921թ. փետրվարի 16-ին Ինքնավար Սյունիքի զորքերը, արևմտյան ճակատի զորահրամանատար Յապոնի ղեկավարությամբ շարժվում են առաջ և առանց կռիվի գրավում են Վայոց ձորը: Խորհրդային զորքերը դիմադրություն ցույց չեն տալիս, արյուն չի թափվում, գերի է վերցվում «ամբողջ զորամասը» (մոտ 900 հոգի), Վայոց ձորն անցնում է Գ. Նժդեհի զորքերի վերահսկողության տակ (Գեորգեան 1991, 147; Նժդեհ 2002, 133): Փետրվարի 27-ին Գ. Նժդեհը գալիս է Քելշիշքենդ (Եղեգնաձոր), որտեղ ժողովուրդը նրան ընդունում է մեծ խանդավառությամբ: Մարտի 2-ին Քելշիշքենդում հրավիրված Գյուղացիական համագումարը որոշում է Վայոց ձորը միացնել Սյունիքին (ՀԱԱ, ֆ. 37, ց. 1, գ. 24, թ. 2–3): Արխիվային փաստաթղթերից մեկում կարդում ենք. «Գյուղացիական համագումարը Դարավազյազը միավորել է հակախորհրդային Զանգեզուրին՝ իր ներկայացուցիչը ուղարկելով Սյունիքի կառավարության մեջ: Հռչակված է Լեռնային Հայաստան, որի կազմի մեջ են մտնում Զանգեզուրը, Ղարաբաղը, Դարավազյազը (Վայոց ձոր – Գ.Ղ.)» (ՀԱԱ, ֆ. 37, ց. 1, գ. 9, թ. 34): Այսպիսով 1921թ. մարտի սկզբին Ինքնավար Սյունիքի սահմաններն ընդլայնվեցին՝ ներառելով նաև Վայոց ձորն ու Լեռնային Ղարաբաղի մի զգալի մասը: Փետրվարյան ապստամբության շրջանում Հայրենիքի փրկության կոմիտեն կարողացել էր ազատագրել Երևանը և վերականգնել Հայաստանի Հանրապետությունը, որը հաճախ կոչվում էր Արարատյան Հայաստան կամ Մայր Հայաստան: Միննույն ժամանակ, Ինքնավար Սյունիքը, որն արդեն դուրս էր եկել Սյունիքի (նախկին Զանգեզուրի) սահմաններից, սկսեց կոչվել Լեռնային Հայաստան կամ Ինքնավար Լեռնահայաստան: Այս շրջանից սկսած տարբեր գործիչներին ուղարկած Գ. Նժդեհի գրություններում հաճախ ենք հանդիպում «Լեռնային Հայաստանի սպարապետ՝ Նժդեհ» մակագրությունը (Նժդեհ 2002, 323), իսկ Սյունիքի բնակչությունը անվանվում է «լեռնահայություն»: Ս. Վրացյանի տողերում

կարդում ենք. «Հայաստանում կատարված փոփոխությունը շատ ուշ է իմացվում Ջանգեգուրում: Անկախ Հայաստանի դեպքերից, իր ռազմագիտական սահմաններն ապահովելու նպատակով, փետրվարի 17-ին, զանգեգուրյան հրամանատարությունը, ընդառաջ գնալով ժողովրդի ցանկությանը, գրավում է ամբողջ Դարալագեազը և միացնում ինքնավար Սյունիքին՝ վերջինս վերակոչելով Ինքնավար Լեռնահայաստան: Ինքնավար Լեռնահայաստանին մեծ դեր վիճակվեց խաղալու իր ազատության համար մաքառող ժողովրդի հետագա կյանքում» (Վրացեան 1967, 174): Մարտի 8-ին Ներքին Ախտայից (Հրազդան) Հ. Օհանջանյանը Գ. Նժդեհին գրում էր. «Ստացա նամակդ և իսկույն ուղարկեցի Երևան, իբրև առաջին պաշտոնական կապը Լեռնահայաստանի և Մայր Հայաստանի» (Նժդեհ 2002, 137):

Ինքնավար Սյունիքի հաջողությունները Վայոց ձորում, ինչպես նաև Փետրվարյան ապստամբության բռնկումը համակում է նաև Նոր Բայազետի⁸ մի մասին: «Սյունիքի մեր հաջողությունների ազդեցության տակ պողոթկում է և Բասարգեչարը (Վարդենիս – Գ.Ղ.): Այդ շրջանում կանգնած բուլղարական թնդանոթաձիգ գունդը, ապստամբելով խորհրդային իշխանության դեմ, շարժվում է դեպի Նոր Բայազետ քաղաքը և, առանց կռվի, գրավում է վերջինը» — գրում է Գ. Նժդեհը (Նժդեհ 2002, 134): Գ. Նժդեհի կարգադրությամբ, տեղում նոր ջոկատներ կազմակերպելու նպատակով, Նոր Բայազետի շրջան են մեկնում խմբապետներ Մեսրոպը և Գ. Շահինյանը (Նժդեհ 2002, 134; Հարությունյան 2015, 110): Հ. Օհանջանյանի մի գրությունից պարզ է դառնում, որ Մեսրոպն ու Գ. Շահինյանը Նոր Բայազետ էին անցել Գ. Նժդեհի Դարալագեազում գտնվող զինվորներով: 1921թ. մարտի 7-ին Հ. Օհանջանյանը ուղիղ կապով հաղորդում է Հայրենիքի փրկության կոմիտեի նախագահ Ս. Վրացյանին. «Մարտի 5-ին Մեսրոպը և Շահինյանը Նժդեհի Դարալագեազի զինվորներով մտել են Նոր Բայազետ» (ՀԱԱ, ֆ. 37, ց. 1, գ. 9, թ. 30): Արխիվային փաստաթղթերից մեկում կարդում ենք. «Մարտի 5-ին Նժդեհի դարալագեազյան ջոկատը գրավել է Նոր-Բայազետ քաղաքը, այն մաքրելով բուլղարներից» (ՀԱԱ, ֆ. 37, ց. 1, գ. 9, թ. 34): Խմբապետներ Աղաբեկի, Մեսրոպի և Գ. Շահինյանի խնդրանքով շուտով Նոր Բայազետ է անցնում նաև Գ. Նժդեհը 100 հեծյալների խմբով (Նժդեհ 2002, 134–136; Հարությունյան 2015, 114–115): Գ. Նժդեհի Նոր Բայազետ անցնելը մեծ ազդեցություն գործեց Կարմիր բանակի հրամանատարության վրա: Այս առթիվ Ա. Շիրմախները իր վերադաս Մ. Մուկոչյանովին գրում է. «Նոր Բայազետի տեղամասում հակառակորդը կենտրոնացել է Երանոս-Ղարանլուղում և նպատակ ունի շուտով անցնել հարձակման: Այդ տեղամասը ղեկավարում է լեռնային գայլ Նժդեհը» (Հարությունյան 2015, 114): Մարտի 10-ին Նոր Բայազետի և Գ. Նժդեհի ապստամբական ուժերն անցան հարձակման և վերահսկողության տակ առան Ալեքսանդրովկա (Չկարովկա) գյուղը, սակայն Ելենովկան (Սևան) գրավել հնարավոր չէղավ (Նժդեհ 2002, 138–140; Հարությունյան 2015, 117–118):

Այսպիսով՝ թեպետ Նոր Բայազետի գրավումը հնարավոր եղավ Փետրվար-

⁸ Նոր Բայազետի գավառը տարածվում էր Սևանա լճի առափնյա շրջանում: Հիմնականում համապատասխանում է Մեծ Հայքի Սյունիք աշխարհի Գեղարքունիք և Սոթք գավառներին, ներկայում՝ ՀՀ Գեղարքունիքի մարզին (Հակոբյան և ուրիշներ 1998, 24):

յան ապստամբության շնորհիվ, սակայն Երանոս-Ղարանլուղում և Նոր Բայազետում մարտնչող զորքերի զգալի մասը Սյունիքից էր, իսկ տեղի զորքերի հրամանատարները ենթարկվում էին Գ. Նժդեհին: «Սյունիքը... գրավել էր Վայոց Ձորը և իջել Նոր Բայազետ», — գրում է Գ. Նժդեհը (Նժդեհ 1999, 94): Նոր Բայազետում Գ. Նժդեհի զորքերը կարողացան վերահսկողության տակ վերցնել Սևանա լճի հարավային և արևմտյան ափամերձ տարածքները (քարտեզ 1): Նոր Բայազետ (Գավառ), Ղարանլուղ (Մարտունի) և Բասարգեչար (Վարդենիս): Ինչպես տեսանք Նոր Բայազետի շրջանում հնարավոր եղավ վերահսկողություն հաստատել ընդհուպ մինչև Ալեքսանդրովկա: Կոտո Թարխանյանի կազմած քարտեզից պարզ է դառնում, որ Բասարգեչարի շրջանում Գ. Նժդեհի գլխավորած զորքերի վերահսկողության տակ են անցել Սևանա լճի հարավարևելյան ափամերձ շրջանները՝ ընդհուպ մինչև Կզըլքենդ (Ծափաթաղ) գյուղը (քարտեզ 1):

Նոր Բայազետում երկար հիմնավորվել հնարավոր չեղավ, քանզի տեղի բնակչության մեծ մասն անտարբեր էր, իսկ որոշ հատված անգամ հակառակորդին էր սատարում (Հակոբյան 1948, 83–84; Նժդեհ 2002, 140–141): Մարտական գործողությունների արդյունքում ապստամբական ուժերը սկզբում քաշվում են Երանոս, ապա Ղարանլուղ (Մարտունի) (Հակոբյան 1948, 83–84): Կարևորելով Սելիմի լեռնանցքի (Վարդենյաց լեռնանցք) ռազմավարական նշանակությունը Վայոց ձորի և Սյունիքի համար՝ Գ. Նժդեհը զորքեր է թողնում Ղարանլուղում, նշանակում ղեկավարներ և վերադառնում Վայոց ձոր՝ Նոր Բայազետի ընդհանուր հրամանատարությանը հրահանգելով «ամեն գնով թունր կանգնել թշնամու առաջխաղացման դեմ դեպի Ղարանլուղ և Սելիմի լեռնանցքը» (Նժդեհ 2002, 141):

Գ. Նժդեհի վկայությամբ՝ Նոր Բայազետի շրջանը Սյունիքի զորքերը թողեցին Երևանի անկումից (ապրիլի 2) յոթ օր հետո, երբ «Արարատյան գաղթականությունն արդեն գտնվում էր Վայոց ձորում և Սիսիանում» (Նժդեհ 2002, 141): Հետևաբար՝ 1921թ. ապրիլի 9-ից, այդ շրջանն արդեն դուրս էր գտնվում Սյունիք-Լեռնահայաստանի զորքերի վերահսկողության սահմաններից: Դեպքերի սրընթաց զարգացման հետևանքով Նոր Բայազետը Սյունիք-Լեռնահայաստանի վարչաքաղաքական համակարգում չներառվեց (Նժդեհ 2002, 480):

Վայոց ձորում Գ. Նժդեհը, Սյունիքի ու Երևանի միջև ճանապարհի բացելու և Երևանի ապստամբական ուժերի հետ կապ հաստատելու համար, հրամայում է Դարալագյազի հրամանատար Յապոնին կապվել Երևանյան զորամասի հետ և ինքը մեկնում է Սյունիք (Նժդեհ 2002, 142): 1921թ. մարտի 25-ին Հայրենիքի փրկության կոմիտեի նախագահ Սիմոն Վրացյանը գրություն է ուղարկում Գ. Նժդեհին և Յապոնին՝ խնդրելով բացել Երևան-Դարալագյազ-Ջանգեզուր գիծը, որը, ըստ նրա հրատապ էր և իրենց համար ուներ կենսական նշանակություն (Նժդեհ 2002, 144; Գեորգեան 1991, 151–152): Յապոնի գլխավորությամբ Սյունիք-Լեռնահայաստանի զորքերը գրավում են Դարալագյազի և Չանախչիի (Ջանգակատուն) միջև ընկած թուրքաբնակ գյուղերը և կապվում Երևանի հետ (Գեորգեան 1991, 152): Այսպիսով, Վայոց ձորի շրջանում Սյունիք-Լեռնահայաստանի ուժերը հասնում են մեծ հաջողության՝ վերահսկողություն հաստատելով ընդհուպ մինչև Չանախչի գյուղ (Նժդեհ 2002, 434, 481):

Երևանում Փետրվարյան ապստամբությունն անհաջող վախճան է ունենում, խորհրդային զորքերը գրավում են մայրաքաղաքը: Ապստամբական ուժերը տեղի են տալիս և խորհրդային իշխանությունների վրեժխնդրությունից խուսափելու համար Երևան-Դարալագյազ ճանապարհով մազապուրծ հասնում Զանգեզուր: Գաղթականության խունապահար նահանջը դեպի Վայոց ձոր հոգեբանական ծանր ազդեցություն է ունենում շրջանում, ինչի արդյունքում այստեղ գտնվող փոքրաթիվ զանգեզուրյան զորամասերը թողնում են գավառի մեծ մասը և ամրանում Գնդեվազ գյուղում (Սիմոնյան 2017, 863, 866): Սակայն արևմտյան ճակատում իրադրությունը մնում էր անկայուն: Ճակատի հրամանատար նշանակված Կոտոյի ռազմակայանը ապրիլի վերջին արդեն գտնվում էր Սիսիանի տարածքի վերջին գյուղում՝ Բազարչայում (Սիմոնյան 2017, 868): Այսպիսով ապրիլի 9-ից մինչև 15-ը Սյունիքի ուժերը հետ են քաշվում Ղարանլուղի, Բասարգեչարի և Դարալագյազի շրջաններից (Հակոբյան 1948, 88):

1921թ. հունիսի 1-ին Գ. Նժդեհը փոխապարապետ Կոտոյին հրամայում է վերագրավել Վայոց ձորը. «Հրամայում եմ Ձեզ տրված մարտական խնդիրը Վայոց Ձորի վերագրավումը, իրագործել ոչ ուշ քան ամսույս 7-ին (հունիսի): ...Կռիվները ղեկավարել անձամբ և բոլոր զորամասերի պետերից պահանջել «մեռնել, բայց հաղթել» (Նժդեհ 2002, 373): Կոտոն սակայն ուշացնում է Վայոց ձորի գրավումը՝ հունիսի 7-ի փոխարեն մարտական գործողությունները սկսելով հունիսի 15-ին (Նժդեհ 1999, 143): Լեռնահայաստանի զորքերը, փոխապարապետ Կոտոյի ղեկավարությամբ, ռազմական գործողություններ են սկսում Վայոց ձորում, որն ավարտվում է փայլուն հաղթանակով (Ղազարյան 2022, 54): Հունիսի 16-ին Կոտոն Գ. Նժդեհին հեռագիր է ուղարկում՝ տեղեկացնելով թշնամու զորամասի ջախջախման, զորքերի անկանոն և սարսափահար նահանջի, վերցված զերինների, զենքերի և ռազմամթերքի մասին (Նժդեհ 1999, 143–144): Հունիսի 17-ին թշնամին կրում է նոր կորուստներ: Վայոց ձորն ամբողջությամբ անցնում է Սյունիքի ուժերի վերահսկողության տակ: Խորհրդային զորքերը նահանջում են Ղարանլուղի և Արարատյան դաշտի ուղղությամբ (Սիմոնյան 2017, 947, 949): Սակայն Վայոց ձորը երկար պահել չհաջողվեց. խորհրդային զորքերը հունիսի 22-ին անցնում են հարձակման (Սիմոնյան 2017, 960): Այստեղ գտնվող Երևանյան զորամասն անսպասելիորեն անցավ հակառակորդի կողմը: Գ. Նժդեհի վկայությամբ, խորհրդային իշխանությունները դասալիք և թշնամի էին հայտարարվել Սյունիք ապաստանած Երևանյան զինվորներին և սպառնացել, թե «Նժդեհի դրոշի տակ մնալու դեպքում բռնագրավել նրանց սեփականությունը և բանտերը լցնել նրանց ծնողներին» (Նժդեհ 1999, 146): Հետագայում, մինչև հուլիսի կեսերը, արդեն նորից Զանգեզուրն անցավ խորհրդային զորքերի վերահսկողության տակ, իսկ Լեռնահայաստանի Հանրապետությունը դադարեց գոյություն ունենալուց: 1921թ. հունիսի Վայոց ձորի վերագրավումը եղավ Լեռնահայաստանի վերջին տարածքային ձեռքբերումը:

Գողթան

1920թ. ամռանը Նախիջևանի հետ խորհրդայնացվել էր նաև Գողթան գավառակը (Սիմոնյան 2017, 947, 842): Նույն թվականի հոկտեմբեր-նոյեմբեր ամիս-

ներին Գողթանը կարողանում է հետ շարտել հակառակորդի գրոհները: Նոյեմբերի 4-ին Գողթանի Բիստ գյուղում տեղի է ունենում ժողով, որտեղ որոշվում է օգնություն խնդրել Գ. Նժդեհից: Ռազմաքաղաքական բարդ իրադրությունը հնարավորություն էր տալիս Գ. Նժդեհին անձամբ օգնության հասնել պատմական Գողթանին (Սիմոնյան 2017, 713–714): Սակայն վերջինս բազմաթիվ անգամ դիմեց Հայաստանի Հանրապետության կառավարությանը՝ խնդրելով օգնել Գողթանին. «...արագացրեք Նախիջևանի գրավումը, եթե չեք ուզում ընդմիջտ կորցրած լինել Գողթանը, գուցե և Նախիջևանը» (Նժդեհ 2002, 315): 1920 թ. վերջին Գողթանից հայկական ուժերի վերահսկողության տակ էր գտնվում միայն 6 գյուղ (Ցղնա, Փառակա, Ռամիս (Ռումիս), Բիստ, Ալահի և Մարվանիս (Մեսրոպավան, Նասրվազ))՝ մոտ 5000 բնակչությամբ (Նախիջևան-Շարուր 1993, 221; Սիմոնյան 2017, 768):

1921 թ. փետրվարի 4-ին Ռ. Տեր-Մինասյանին հասցեագրված Գ. Նժդեհի նամակը գրված է «Մպարապետ Ինքնավար Սյունիքի և Գողթանի» դրոշմակնիքով (Նժդեհ 2002, 321): Փետրվարի 12-ին բուլշևիկները տեղի թուրք-թաթարական տարրերի հետ հարձակվում են Գողթանի վրա: Գողթանի ինքնապաշտպանական ուժերը կարողանում են Գ. Նժդեհի զինակիցներից Ղազար Քոչարյանի զլխավորությամբ 1921 թ. փետրվարի 13-ին հակահարված տալ թշնամուն՝ ստիպելով նրան նահանջել (Գեորգեան 1991, 128–129): 1921 թ. հունվար-փետրվար ամիսներին գրված մի շարք գրություններում Գ. Նժդեհին դիմում են կամ վերջինս ներկայանում է իբրև «Մպարապետ Ինքնավար Սյունիքի և Գողթանի» (Գեորգեան 1991, 134, 148, 181):

Գողթանը, լինելով մեկուսացված արտաքին աշխարհից և զրկված բավարար սննդամթերքից, ինչպես նաև զենքի և ռազմամթերքի սահմանափակ պաշարներ ունենալով, մեծ դժվարությունների պայմաններում պայքարում էր իր ինքնավարության պահպանման համար: 1921 թ. սկզբին սովն այստեղ հասավ ծայրահեղ աստիճանի: «Գողթանը գործածեց անգամ կատուի և իշու միս», — հիշում է Գ. Նժդեհը (Նժդեհ 1999, 138): Գողթանը, սովամահությունից փրկվելու համար, ընդունում է Երևանի Հեղկոմի առաջարկը. «Հաց կտանք Գողթանին, եթե նա ճանաչի խորհրդային իշխանությունը»: Գողթանը հայտարարվում է խորհրդային (Գեորգեան 1991, 129, Նժդեհ 1999, 140–141):

1921 թ. մարտի վերջերին՝ Վայոց ձորը գրավելուց հետո, Գ. Նժդեհը գրություններ է ուղարկում Գողթանի գյուղեր, բնակչությանը հորդորելով հավատարիմ մնալ հայրենիքի միասնության գաղափարին (Նժդեհ 2002, 432, 434–435): 1921 թ. մարտի 30-ին Գ. Նժդեհը գրություն է ուղարկում Գողթանի խորհրդային իշխանության ներկայացուցիչ Քրիստափոր Տեր-Մկրտչյանին. «Պրն. Քրիստափոր, երբ դեռ Արարատյան Հայաստանը կարմիր սրիկաների ձեռքին էր՝ հասկանալի էր ձեր կատարածը, Գողթանի սովետականացումը, իսկ այսօր, երբ Արարատյան Հայաստանում ժողովուրդն ապստամբությամբ մաքրել է իր երկիրը, ձեր սովետական իշխանություն ճանաչելը, անմիտ լինելուց զատ, դավաճանություն է: Առաջարկում եմ՝

1. Անմիջապես Գողթանը հայտարարել Արարատյան Հանրապետության անբաժանելի մասը:

2. Ձերբակալել դրսեցի սրիկաներին և հանձնել ինձ:
3. Կանոնավորել հայ-թրքական երթևեկություններն ու փոխհարաբերությունները:
4. Մի պատգամավորություն ուղարկել ինձ մոտ, որ որոշ գրություններ ստանալով անցնի Երևան՝ հոգալու Գողթանի կարիքները: Սպարապետ Նժդեհ» (ՀԱԱ, ֆ. 314, ց. 1, գ. 38, թ. 1-4):

Սակայն Փետրվարյան ապստամբության պարտությունը և Երևանի անկումը հնարավորություն չստեղծեցին Գողթանի հարցի լուծման համար:

1921թ. ապրիլին, երբ երևանյան գաղթականությունը ապաստան գտավ Սյունիքում, Գ. Նժդեհը արևմտահայ գործառնապի հրամանատար Սմբատ Բորոյանին (Մախլուտո) կարգադրեց անցնել Գողթանի շրջան՝ այն ռազմագիտորեն ամրացնելու և հետագա գործողություններում աջակցություն ցուցաբերելու համար (Նժդեհ 2002, 367): Գ. Նժդեհի Մախլուտոյին ուղղված ապրիլի 23-ի գրությունում կարդում ենք. «...Միօրյա հանգստից հետո (Քաջարանում) Ձեր գորքերը պետք է իջնեն Գողթան...» (Նժդեհ 2002, 327): Սակայն արևմտահայ զինվորականությունը հրաժարվում է կատարել այս հրամանը, որի մասին մայիսի 3-ին Մախլուտոն Լիճք գյուղից տեղեկացնում է Գ. Նժդեհին. «Խորապես ցավում եմ, որ հնարավոր չեղավ մեզ իրագործելու Ձեր հրամանը՝ Ղափուջուղի վրայով դեպի Գողթան: Մոտ 1000 հոգով մեկնեցինք Քաջարան, որտեղից պիտի ճամբա ելնեինք, դժբախտաբար զինվորությունը լեռան առջև, մեկ կողմից անձամբ լսելով տեղացի ազգաբնակչության լեռան և անցքի մասին տված դժվարալուր տեղեկությունները, մյուս կողմից պատճառաբանելով իր հոգնածությունը, մերկ, բոկոտն ու քաղցած վիճակը մերժեց այդ ուղղությամբ շարժվել բանավոր և գրավոր, որոնց օրինակներն և պատճենները կմնան այժմ մեր տրամադրության տակ» (Նժդեհ 2002, 367-368): 1921թ. մայիսին Գողթանի շրջանում մնացած մի քանի հայկական գյուղերի բնակիչներ հայտարարում էին, որ իրենց «ֆիզիկական գոյության պահպանումը և տնտեսական կյանքի շահը պահանջում է լինել Խորհրդային Հայաստանի հետ» (Միմոնյան 2017, 932):

Եզրակացություն

Այսպիսով, հիմնվելով մեր կողմից իրականացված հետազոտության արդյունքների վրա, կարելի է եզրակացնել, որ Ինքնավար Սյունիք-Լեռնահայաստանը բազմաթիվ անգամ ունեցել է տարածքային ձեռքբերումներ և կորուստներ: Հանրապետության սահմաններն անընդհատ փոփոխվել են վերջինիս գոյության ամբողջ ընթացքում: Հիմքում ունենալով Զանգեզուրը, այն ընդարձակվել է՝ ընդգրկելով հարակից որոշ երկրամասեր, սակայն միաժամանակ նաև ունեցել է տարածքային կորուստներ՝ ռազմաքաղաքական գերլարված իրադարձությունների արդյունքում չկարողանալով որոշ հատվածներում անհրաժեշտ կերպով հաստատվել և պահպանել կայուն վերահսկողություն:

Լեռնահայաստանն իր գոյության ընթացքում կարողացել է հանրապետության սահմաններում ներառել Զանգեզուրը՝ իր 6 շրջաններով՝ բուն Զանգեզուր (Գորիս), Տաթևի ձոր, Ղափան (Կապան), Դարաբասի ձոր, Միսիան, Գենվազ (Արևիք, Մեղրի), ինչպես նաև Բարգուշատը, Գողթանը՝ իր 6 գյուղերով՝ Յոնա, Փա-

ռակա, Ռամիս (Ռումիս), Բիստ, Ալահի և Մարվանիս (Մետրոպոլիս, Նասրվազ): Վայոց ձորը՝ ամբողջությամբ (մինչև Չանախչի (Ջանգակատուն)), Լեռնային Ղարաբաղը (Գիգակ, Վարանդա, Խաչեն՝ մասամբ) և Նոր Բայազետը (Նոր Բայազետ՝ մինչև Ալեքսանդրովկա (Չկալովկա), Ղարանյուղ (Մարտունի), Բասարգեչար՝ մինչև Կզըլքենդ (Ծափաթաղ)): Ընդ որում, պետք է հաշվի առնել, որ վերը ներկայացված են այն տարածքները, որոնք Լեռնահայաստանի Հանրապետության գոյության ընթացքում երբևէ գտնվել են նրա զինված ուժերի փաստացի վերահսկողության ներքո: Սակայն դրանք երբեք միաժամանակ չեն ընդգրկվել հանրապետության կազմում: Ստորև ներկայացնում ենք Սյունիք-Լեռնահայաստանի Հանրապետության զինված ուժերի վերահսկողության ներքո գտնված տարածքների ժամանակագրությունը.

Զանգեզուր – 1920 թ. դեկտեմբերի վերջ – 1921 թ. հուլիսի կեսեր
 Լեռնային Ղարաբաղ – 1921 թ. հունվարի կեսեր – ապրիլի կեսեր
 Վայոց ձոր – 1921 թ. փետրվար – ապրիլի կեսեր, 1921 թ. հունիսի 15 – 22
 Նոր Բայազետ – 1921 թ. մարտի 5 – ապրիլի 9
 Գողթան – 1920 թ. դեկտեմբերի վերջ – 1921 թ. փետրվարի վերջ

Իրենց առավելագույն ընդգրկմամբ Լեռնահայաստանի Հանրապետության բնական սահմաններն արևմուտքում ձգվում էին Զանգեզուրի լեռնաշղթայով՝ ներառելով Գողթանի հյուսիսային մասում, Զանգեզուրի լեռների արևմտյան լանջերին, Գիլան (Գիլանչալ) և Ցղնա (Դույուլունչալ) գետերի վերին հոսանքների շրջաններում գտնվող հայկական գյուղերը: Այնուհետև սահմանն անցնում էր Վայքի (Հայոց ձորի) լեռներով մինչև Զանգակատուն գյուղ, այստեղից Գեղամա լեռներով դեպի հյուսիս-արևելք՝ ընդգրկելով Սևանա լճի արևմտյան, հարավային և հարավարևելյան ափամերձ տարածքները (Ալեքսանդրովկայից (Չկալովկա) մինչև Կզըլքենդ (Ծափաթաղ) գծով): Այնուհետև սահմանն անցնում էր Սևանի և Արևելյան Սևանի լեռներով, ձգվում դեպի հարավ՝ անցնելով Սյունիքի բարձրավանդակի կենտրոնական մասերով՝ ներառելով նաև Սև լիճը, հասնում էր Հազարի (Աղավտ) գետի վերին հոսանքի շրջան: Այնուհետև սահմանը ձգվում էր արևելք՝ անցնելով Բերձորի լեռներով և Կարկառ գետի հովտով, հասնում մինչև Աղդամ (Ակնա)՝ դուրս գալով Դաշտային Արցախ: Այստեղից սահմանը թեքվում էր դեպի հարավ՝ հասնելով մինչև Վարանդա գետի միջին հոսանքի շրջան, ապա, թեքվելով դեպի արևմուտք, հասնում էր մինչև Ջաբրայիլ (Ջրական): Այնուհետև Արցախի լեռների հարավարևմտյան լանջերով ձգվում էր մինչև Որոտան և Հազարի գետերի միախառնման վայրից հյուսիս ընկած Խանլըղ (Խանուխ) գյուղի շրջան, ապա, թեքվելով դեպի հարավ-արևմուտք, Բարգուշատի և Մեղրու լեռների արևելյան ստորոտներով հասնում էր Արաքս գետ: Հարավում Արաքսի հովտով շարունակվում էր մինչև Զանգեզուրի լեռների հարավային ստորոտները:

Նշված սահմաններն ընդգրկել են մոտ 15 000 քառ. կմ տարածք, ինչը շուրջ 2 անգամ գերազանցում է Ռուսական կայսրության Ելիզավետպոլի նահանգի Զանգեզուրի գավառի տարածքը և մոտ 3.33 անգամ՝ ներկայիս ՀՀ Սյունիքի մարզի տարածքը:

Վարդան Գեորգեանն այսպես է ներկայացնում Լեոնահայաստանի սահմանների կարևորությունը Հայաստանի համար. «դէպքերու ճակատագրական դասաւորութեամբ մը վաղուան մեր սերունդը կարմիր կտակ մը ունի ժառանգելիք, ինչ որ քիչ մը ևս պիտի խորացնէ իր խիզախութիւնն ու ապրելու անյողդող կամբը: Ու ան պիտի սորվի, թէ առանց Հայկական Լեոնաշխարհի, առանց այսինքն Ղարաբաղի և Զանգեզուրի, չի կրնար խաղաղ ու ապահով ապրիլ Հայկական կառավարութիւն մը ներկայ իր աշխարհագրական սահմաններուն մէջ» (Գեորգեան 1991, 17): Եվ իսկապէս, Արցախյան 44-օրյա պատերազմից հետո տարածաշրջանում ստեղծված ռազմաքաղաքական բարդ իրավիճակում Լեոնահայաստանի Հանրապետության սահմանները, որի հիմքը ՀՀ Սյունիքի մարզն է, Հայաստանի Հանրապետության համար ունեն ռազմավարական և աշխարհաքաղաքական կարևոր նշանակություն:

ՕԳՏԱԳՈՐԾՎԱԾ ՍԿՉԲՆԱՂԲՅՈՒՐՆԵՐԻ ԵՎ ԳՐԱԿԱՆՈՒԹՅԱՆ ՑԱՆԿ

Արխիվային փաստաթղթեր

ՀԱԱ, ֆ. 314, ց. 1, գ. 38, թ. 1-4:

ՀԱԱ, ֆ. 37, ց. 1, գ. 24, թ. 2-3:

ՀԱԱ, ֆ. 37, ց. 1, գ. 9, թ. 30:

ՀԱԱ, ֆ. 37, ց. 1, գ. 9, թ. 34:

Պարբերական մամուլ

ԱԶԱՏ ՀԱՅԱՍՏԱՆ 1921 – «Ազատ Հայաստան», 1921, 9 մարտի, № 16:

Գրականություն

ԱԲՐԱՀԱՄՅԱՆ 1998 – Աբրահամյան Հ., *Թևան*, Երևան, 1998:

ԱԲՐԱՀԱՄՅԱՆ 2003 – Աբրահամյան Հ., *Մարտնչող Արցախը. 1917–2000*, գիրք Ա, 1917–1923. Երևան, 2003:

ԱԼԵԿՍԱՆՅԱՆ 2019 – Ալեքսանյան Ա., Գարեգին Նժդեհի քաղաքական իրավական հայացքները, *ԵՊՀ Իրավագիտության ֆակուլտետի պրոֆեսորադասախոսական կազմի գիտաժողովի նյութերի ժողովածու*, Երևան, 2019, № 2(2), 17–28:

ԲԱԼԱՅԱՆ 2011 – Բալայան Վ., *Արցախի պայմանությունը հնադարից մինչև մեր օրերը*, Երևան, 2011:

ԲՈՒԴՈՒԻՆ 2022 – Բոլդուին Օ., *Վեց բանարարկություն և հեղափոխություն*, Երևան, 2022:

ԳԷՕՐԳԵԱՆ 1991 – Գեորգեան Վ., *Լեոնահայաստանի հերոսամարտը*, Երևան, 1991:

ԶԻԼՖՈՒՂԱՐՅԱՆ 2008 – Զիլֆուղարյան Մ., *Լեոնահայաստանի Հանրապետությունը. Սյունիքի սահմանադրությունը*, Գորիս, 2008:

ԼԻՄԻՑՅԱՆ 1969 – Լիսիցյան Ս., *Զանգեզուրի հայերը*, Երևան, 1969:

ԽԱՉԱՏՐՅԱՆ և ՈՒՐԻՇՆԵՐ 2015 – Խաչատրյան Կ., Սուքիասյան Հ., Բաղայան Գ., *Խորհրդային Հայաստանի և ԼՂԻՄ-ի տարածքային կորուստները 1920–1930-ական թվականներին*, Երևան, 2015:

ԽՈՒՂԱՎԵՐԴՅԱՆ 1988 – Խոտավերդյան Բ., *Զանգեզուր*, Երևան, 1988:

ՀԱՎՈՒԹՅԱՆ 1948 – Հակոբյան Ա., *Քաղաքացիական կռիվները Հայաստանում 1921 թվականին*, Երևան, 1948:

ՀԱՎՈՒԹՅԱՆ ԵՎ ՈՒՐԻՇՆԵՐ 1986 – Հակոբյան Թ., Մելիք-Բախշյան Սո., Բարսեղյան Հ., *Հայաստանի և հարակից շրջանների տեղանունների բառարան*, հ. 1, Երևան, 1986:

- ՀԱՎՈՐՅԱՆ ԵՎ ՈՒՐԻՇՆԵՐ 1988 – Հակոբյան Թ., Մելիք-Բախշյան Ստ., Բարսեղյան Հ., *Հայաստանի և հարակից շրջանների տեղանունների բառարան*, հ. 2, Երևան, 1988:
- ՀԱՎՈՐՅԱՆ ԵՎ ՈՒՐԻՇՆԵՐ 1991 – Հակոբյան Թ., Մելիք-Բախշյան Ստ., Բարսեղյան Հ., *Հայաստանի և հարակից շրջանների տեղանունների բառարան*, հ. 3, Երևան, 1991:
- ՀԱՎՈՐՅԱՆ ԵՎ ՈՒՐԻՇՆԵՐ 1998 – Հակոբյան Թ., Մելիք-Բախշյան Ստ., Բարսեղյան Հ., *Հայաստանի և հարակից շրջանների տեղանունների բառարան*, հ. 4, Երևան, 1998:
- ՀԱՅԱՍՏԱՆԻ ԱԶԳԱՅԻՆ ԱՏԼԱՍ 2008 – *Հայաստանի ազգային արդաս*, մաս Բ (պատասխ. խմբ. Բ. Հարությունյան), Երևան, 2008:
- ՀԱՐՈՒԹՅՈՒՆՅԱՆ 2015 – Հարությունյան Հ., Նոր Բայազետի Գավառը 1921թ. Փետրվարյան ապստամբության ընթացքում, *Լրաբեր հասարակական գիտությունների*, Երևան, 2015, № 2(2), 104–123:
- ՂԱԶՆՐՅԱՆ 2022 – Ղազարյան Գ., Գարեգին Նժդեհը և Արցախի գոյապայքարը 1920–1921 թթ., *Աշխարհություններ Հայաստանի պատմության թանգարանի*, Երևան, 2022, №2(10), 46–57:
- ՆԱԽԻՋԵՎԱՆ-ՇԱՐՈՒՐԸ 1993 – Նախիջևան-Շարուրը 1918–1921 թթ: Փաստաթղթեր և նյութեր, *Բաներ Հայաստանի արխիվների*, Երևան, 1993, թիվ 1–2:
- ՆԺԴԵՀ 1999 – Գարեգին Նժդեհ, *Ազար Սյունիք*, Պէյրոթ, 1999:
- ՆԺԴԵՀ 2002 – Գարեգին Նժդեհ, *Երկեր*, հ. 2, Երևան, 2002:
- ՆԺԴԵՀ 2006 – Գարեգին Նժդեհ, *Հարընարի*, Երևան, 2006:
- ՆԺԴԵՀ 2021 – Գարեգին Նժդեհ, *Իմ պատասխանը*, Երևան, 2021:
- ՍԻՄՈՆՅԱՆ 1998 – Սիմոնյան Ա., Խորհրդային Հայաստանի և Լեոնահայաստանի կառավարությունների ներկայացուցիչների Սիսիանի բանակցությունները (1921 թ. մայիս), *Լրաբեր հասարակական գիտությունների*, Երևան, 1998, №2(2), 69–79:
- ՍԻՄՈՆՅԱՆ 2017 – Սիմոնյան Ա., *Զանգեզուրի գոյամարտը 1917–1921 թթ.*, Երևան, 2017:
- ՍՈՒՔԻԱՍՅԱՆ 2021 – Սուքիասյան Հ., Խորհրդային Հայաստանի Զանգեզուրի գավառի կազմակերպման պատմությունից (1921 թ.), *Հայոց պատմության հարցեր*, Երևան, 2021, № 1 (22), 158–170:
- ՎՐԱՅԵԱՆ 1967 – Վրացեան Ս., *Վեանքի ուղիներով: Դէպեր, դէմքեր, սպրումներ*, հ. Զ, Բէյրութ, 1967:
- ՎՐԱՅՅԱՆ 1993 – Վրացյան Ս., *Հայաստանի Հանրապետություն*, Երևան, 1993:
- КАВКАЗСКИЙ КАЛЕНДАРЬ 1916 - *Кавказский календарь на 1917 г.*, Тифлис, 1916.

Gor Ghazaryan

Yerevan State University

gor.ghazaryan1998@gmail.com

THE BORDERS OF THE REPUBLIC OF MOUNTAINOUS ARMENIA

Keywords: Republic of Mountainous Armenia, Syunik, Zangezur, Artsakh, Vayots Dzor, Nor Bayazet, Goghtan, Garegin Nzhdeh.

In December 1920, following the forced Sovietization of Armenia, Zangezur refused to accept the newly imposed situation, considering it the result of a conspiracy between Kemalist Turkey and Soviet Russia. On December 25, 1920, the First Pan-Zangezur Congress declared the region autonomous until political conditions would allow it to reunite with "its motherland, Armenia." Thus, the Autonomous Republic of Syunik was estab-

lished, which was renamed the Republic of Mountainous Armenia at the Second Pan-Zangezur Congress held on April 26, 1921.

The Syunik-Mountainous Armenia Republic (Autonomous Syunik and Mountainous Armenia), although not internationally recognized, played a significant role in Armenian history during its short existence (December 1920 – July 1921). The borders of the Republic of Mountainous Armenia later became the foundation for the Zangezur District of Soviet Armenia and, following independence in 1991, for the Syunik Province of the Republic of Armenia. Therefore, the clarification of these borders is of critical importance in the context of current geopolitical developments.

For the first time, this study attempts to clarify the borders of the Republic of Mountainous Armenia based on historical primary sources and academic literature. It also aims to identify the territories that were ever included within its composition and to examine the territorial changes during its existence, along with the primary causes behind them. The study additionally addresses the administrative divisions of the Republic and, based on historical-geographical analyses, identifies several settlements mentioned during the period under review with their corresponding present-day locations.

Гор Казарян

Ереванский государственный университет

gor.ghazaryan1998@gmail.com

ГРАНИЦЫ РЕСПУБЛИКИ ГОРНОЙ АРМЕНИИ

Ключевые слова: Республика Горная Армения, Сюник, Зангезур, Арцах, Вайоц Дзор, Нор-Баязет, Гохтан, Гарегин Нжде.

В декабре 1920 года, после вынужденной советизации Армении, Зангезур отказался признать сложившуюся ситуацию, считая ее результатом заговора Кемалистской Турции и Советской России. 25 декабря 1920 года на Первом Все-Зангезурском съезде регион был объявлен автономным до появления политической возможности вновь объединиться с «Материнской страной — Арменией». Таким образом, была создана Автономная Республика Сюник, которая на Втором Все-Зангезурском съезде 26 апреля 1921 года была переименована в Республику Горная Армения.

Республика Сюник-Горная Армения (Автономный Сюник и Горная Армения), хотя и не получила международного признания, сыграла значительную роль в истории армянского народа в период своего кратковременного существования (декабрь 1920 года — июль 1921 года). Границы Республики Горная Армения впоследствии стали основой для формирования Зангезурского уезда Советской Армении, а после обретения независимости в 1991 году — для Сюникской области Республики Армения. Таким образом, уточнение этих границ имеет важное значение в контексте современных геополитических процессов.

В настоящем исследовании предпринята первая попытка уточнить границы Республики Горная Армения на основе исторических первоисточников и научной литературы. Цель исследования — определить территории, которые когда-либо входили в состав этой республики, а также выявить изменения в границах за время ее существования и основные причины этих изменений. Кроме того, в работе рассмотрены административно-территориальные деления республики, а также на основе историко-географического анализа проведена идентификация ряда населенных пунктов, упоминаемых в исследуемый период, с их современными аналогами.